Horseburgers.

Nothing dates more quickly than a topical song. Still, I quite like this one, and you may be sure that some similar crisis will come up before too long.

Where hae ye been tae, young felly-ma-lad? Whit hae ye been up tae that's made ye sae sad? Ye look as if leevin has lost its appeal, Ye're gey doon in the mooth an ye dinnae look weel.

I'll gie ye nae stories an I'll tell ye nae lee; I went tae ma burd's hoose, for I kent she wis free. We had a wee quickie an went oot for a meal; An ma guts is no richt an I'm no feelin weel.

An whaur did ye go tae young felly-ma-lad? An whit like wis the food an the drink that ye had? Ye should gaun tae the doctor or else take a peel, For ye'r green at the gills an ye dinnae look weel.

I had six pints o Stella, I tell ye nae lee, But I dinnae think that wis whit didnae agree, For the main-course I had wis a special cheap deal, An I've juist spewed ma ring an I'm no feelin weel.

Sae whit wis this main-course young felly-ma-lad? Shairly it cannae hae been aw that bad! Wis it chicken fae China or Vietnamese veal? An ye'd better sit doon, for ye dinnae look weel.

I had the beefburgers, an I tell ye nae lee, I wish I had juist steyed at hame for ma tea! For thae burgers wis bowffin, an the taste wis unreal; An I've skittered ma breeks, an I'm no feelin weel.

Are ye shair whit wis in them young felly-ma-lad? Wis it prime cuts o beef or a load o auld yad? NHS24 a quick cure may reveal, But ye better lie doon, for ye dinnae look weel.

As for the ingredients, I tell ye nae lee, I huvnae a clue, but it seemed strange tae me That a pile o auld horse-shoes lay oot at the back Wi a deid cuddy's heid pokin oot o a sack.

Ye silly-gaun bugger, young felly-ma-lad! Ye've etten horseburgers, an nae hope's tae be had! In quiet resignation in prayer ye should kneel; Efter horses for main-courses ye'll never get weel.